

豫章叢書

第貳冊

理學子類編

己卯冬月
于南昌復廬

理學類編序

夫理莫大於天地幽於鬼神渙於人物微妙於性命
荒唐於異端皆學者所當究而辯焉者也故陸子靜
曰宇宙內事皆吾儒分內事此臨江張九韶氏理學
類編所由作也其所采輯以周子程子邵子張子朱
子之言爲主而本之六經語孟參之諸儒論議而附
以已見無非闡明理學以淑人心焉耳是編昔雖梓
行而傳之者尙未廣也予偶得之觀其顛末而知其
析類之善匪徒詳於紀載以博觀爾也蓋天地鬼神
人物性命理之正也至於異端則非理之正矣世之

君子孰不從事正學間亦有惑於異端者由其見理不真故也是編先之以論天地次之以論鬼神以論人物以論性命崇正也終之以論異端黜邪也崇正黜邪而理學明矣學者誠能以心而會其理推類以盡其餘則天之理甯不一以貫之哉苟或徒事口耳而泥於編之所載其不貽蹉輪者之笑幾希矣茲予以是有補於來學故命工重鋟諸梓以爲理學之助云

嘉靖壬寅春二月吉旦勿齋

理學類編序

古之學者卽事以窮理謹乎彝倫日用以修身不敢
驚乎高遠也故曰道不遠人性也者人所得乎天以
爲德具于人心宜至切矣孔門穎敏莫先子貢而其
言曰性與天道不可得而聞則聖人之設教可知矣
道絕于戰國經燔于秦漢儒專門授受惟事口耳千
有餘年聖賢不傳之緒中興於濂洛關閩諸君子師
友並起論議精到道學之明於斯爲盛朱子所定諸
經四書既有成說而元之設科取士表而宗之宜後
學之有依賴而無所惑矣間嘗觀有司取性命天道

設爲疑問而答者之牴牾不可勝說何哉徒徵諸儒
先之言而無以驗乎身心之實稍以己意增廣演繹
則舛譌隨焉於是子貢之言爲益信而每深歎其未
易聞也臨江張氏九韶采周程以下數子所論天地
鬼神人物性命之說載於成書及其門人之所錄者
輯爲八卷名曰理學類編使學者不待徧閱諸家之
書而可攷乎天道性命之說其用心仁矣哉烏乎知
性則知天矣反求諸身盡乎吾心之量則天地之故
鬼神之跡事物之蘊奚待考索推測而後知哉周子
首繼前聖之絕學作爲圖說發明太極以授程子而

二程終身未嘗以示學者非不欲門人有聞乎天道之妙也以初學之賢而欲窺見天與聖人之道毫釐之差則或淪於高虛而不知切己之實病則程子之教深有望於後世學者之深造自得之也是編所輯固有功於初學矣然學者不知驗夫身心之實以求聖賢之所同則古昔之言又烏能究其孰同而孰異哉故朱子謂格物致知之學與世之博物洽聞者異此以反身窮理爲主而必究其本末是非之極至彼以徇外夸多爲務而不覈其表裏真妄之實然此爲己爲人之所以分不可不察也當以庸下之質蓋嘗

力而恆懼未有聞也因誦是編謹述此爲序而請
教焉臨川吳當序

理學類編後序

天下之物莫不有理惟於理有未窮故其知有不盡也是以大而天命道德之蘊微而鬼神造化之迹皆至理之所寓故凡學者在卽物而窮其理也孟子所謂知性者物格也盡心者知至也物格知至則誠正修身之要事物當然之理可得而知矣臨江張先生美和素習舉子業因見經史浩繁謂學問之道無他唯在格物窮理而已遂蒐閱諸家書采輯先儒所論天地鬼神人物性命之理異端之說各分卷類輯爲一帙名曰理學類編刊布天下以貽後學俾讀者不

待徧閱諸書而天道性命之微人倫日用之常瞭然如示諸掌誠學者之捷徑也況天地鬼神人物性命皆天下正理固學者所當知而異端非理之正易以惑人尤學者所當辨而其編輯之功深有切於學者格物窮理之要也惜乎舊版漫昧散逸裔孫張鳳思紹厥志欲重刊而力莫及宣德癸丑春藩府大參建安連公均因訪是書乃爲之歎曰先生編輯是書期傳悠久爲斯文者豈不惻然以念之哉於是捐俸助工以爲之倡復命郡守朱得同知吳復初等以成其後可謂能以義舉者矣於是太守而次衆志樂從各

施己資鳩工重刊以與四方學者共之板成俾予序
其後予謂是書復出天下之人皆爭相求之奚待予
序而後顯乎亦不過序其功之所自以示不忘之意
云

宣德癸丑秋七月吉日臨江府清江縣儒學訓導三
衢汪賓序

編輯大意

一是編以天地鬼神人物性命異端之說各分爲卷而天地類次又分天文地理亦各爲卷蓋天地者陰陽之體也故居是編之首鬼神者陰陽之用也故居天地之次人物則陰陽之氣聚而成形者故以次於鬼神性命則陰陽之理賦在人物者故又次於人物是四者皆天下之正理而人之所當知者至於異端則非理之正而易以惑人者又必辨而闢之而後可與論天地鬼神人物性命之正理故

以爲是編之終焉

一是編以周子二程子張子邵子朱子六先生之言爲主而本之六經語孟以發其端參之諸儒論議以究其極至於管窺 之 因各以類附見焉觀者幸恕其僭

一所編諸書除六先生之言固無庸議矣其餘諸子之書則取其合於理者稍有可疑皆所不錄

一所引六經語孟之言有先儒傳註者本合作小字分註於下今並以圈隔之而大書列於

本章之下不復作小註至於先儒論議有展轉相發明者亦以圈隔之而就列於其下不復別作一條覽者詳之

理學類編者集先儒之格言而示學者以窮理之要也程子有言物必有理皆所當窮若天地之所以高深鬼神之所以幽顯是也予自蚤歲讀周程張邵朱子之書嘗欲編節天地鬼神之說以及人物性命之言類爲一編以爲初學讀書者窮理之助然以方習舉子業而未暇也浪遊場屋不得志于有司於是退修初服始欲爲前所未暇爲者中更世變屏處山林

乃取諸家之書而蒐閱之取其有關於性理者輯爲五類自天地鬼神人物性命以至辨異端之學莫不類各有目目各有說以究其理蓋格物窮理之一端也或者乃謂初學之士未能致力根本之地而先語之以茫洋不可詰之理幾何而不爲荒誕之歸者殊不知學者之初示之以聖賢格言將以定其見趣使不爲異端怪誕之言所惑是亦進德之地也又何疑乎學者由是而窮天下之理盡人物之性庶幾朱子所謂身心性情之德人倫日用之常以至天地鬼神之變鳥獸草木之宜自其一物之中莫不有以見其

所當然而不容已與其所以然而不可易者皆可由
此而入矣然尙求是正乎當世儒先以刊削其所未
善而增益其所未逮云時至正丙午冬十有二月庚
申臨江後學張九韶美和謹書